

北宗陳致虛七世祖師 ---- 陳子石宗師

陳祖名致虛字觀吾號上陽子。江西省廬陵人。首求道於饒郡趙緣督祖師。繼問道於青城李太虛祖師。盟授大道。了悟仙佛同源。猶參透難問之秘。位列北宗七真之第七世祖。自遇二位聖祖而後。遍遊夜郎邛水沅芷辰陽荆南二鄂長沙廬阜江之東西。每過名山。及諸城邑。隨方作緣。低首下心。開道世人。誘進此道。四十年來。求者紛紛。卒未見有大力量而精進者。所見廣參博採。無非狂談。祖昔未聞道。擬若得之。要與世人。盡諳此道。不相瞞隱。及既得聞。審思密視。果無其人堪傳此道者。凡授百餘人。皆只以道全形之旨。至於以術延命者。百無一二。誠非我祖所敢靳也。只授田侯至陽子而已。蓋欲圖就此事。而以道緣未立。用是求之仙經。搜奇撫粹。著成金丹大要十卷。周易參同契註。悟真篇註。金丹大要圖。金丹大要列仙誌。金丹大要仙派等書行於世。又慮世人非得口傳。寧有自悟。遂用攜書謁蹶。屈己求人。稍有可提可挈者。莫不低首俯身。獎詞勸誨。冀進此道。或遭詬罵。姑自隱忍。偶獲一人兩人之知。及來千人萬人之謗。但欲得行道。不顧是非。遇諸訕聲者。則喜而受之。是真法器者。則勉而進之。其間可入門者。則引之而升階。可升階者。則引之而入室。凡用心至於此者。蓋欲續大道於一線。提流俗於火坑。使世知有金丹不誣也。然我祖雖遇聖師叮嚀。且竭力畢生而後道成。安得凡夫不有師資而可自悟耶。

紀念陳致虛祖師駢言

余雲遊世外。浪跡江干。忝列天台。重宣玄旨。石琴閒撫。難逢識者之音。鐵

笛長吹。豈有動人之慨。時逢春暮。開小講座以傳經。景仰前賢。編第十刊而談秘。夫廬陵我祖。北派七真。闡註參同。奠雙脩之基礎。金丹大要。為至道而歸真。尤觀竅於有情。方了妙於無欲。喻言金玉。出自玄門。譬話河車。當從軌範。燕仍尋舊。水亦歸源。至若學受青城。應別傳乎一得。訣承饒郡。直必尚乎同源。禁秘敢言伯陽之宏願也。妄泄招災平叔之天譴也。必使法器上根。乃遇單符丹訣。存心大事。方成混俗和光。若夫強作妄猜。欺己誤人。朱熹信博。未聞了死之因。韓愈雖豪。難悟超生之果。學必非常。無關小術。義歸實事。不在花言。此則口口相傳。心心相印矣。究其元素。來自有方。真靈必內外之招。電子有陰陽之感。然或重陽教化。(王重陽祖教化白)授爾信徒。雙玉喚龜。(李太虛祖寶雙玉)斥之辯士。每欲貫通三教。方覺真機。命也在於師傳。性兮必從己悟。於是真經了解。心必驚奇。一義難言。意猶摸索。悟真淺註。期相遇乎同人。大要有圖。續長生乎一脈。名聞江左。德頌高昌。路行萬里。道問百人。多為膚說。皆求全形之脩。可語

一無。那願天仙之學。冀有緣於上達。當立德以尋真。本院刊貽。播玄而已。

陳致虛祖師遺產(精神修養要妙-10)

夫乾之爲物陽也。故爲易之門。坤之爲物陰也。故爲易之戶。彼見周易。則指爲卜筮納甲之書。又烏知同類得朋之道乎。彼以鼎器之說。則猜爲金石爐火之事。彼聞採取之說。則猜爲三峰採戰之術。彼聞有爲。則猜爲旁門邪徑。彼聞無爲。則疑是打坐頑空。彼聞大乘。則執爲禪宗空性。求其可入此門。問聖人之道者。億中無一。故言坤之爲用。孤陰則無成。是以用六從乾。乃與類行也。而乾用九匹坤。西南得朋也。此章言陰陽分位各居。陰陽相交。不用一時之久。不盡一爻之用。猶一時有三符。只用一符。正陰陽無邪之道。陰炁在人身中曰火符。陽炁在人身中曰性命。卽于人身。癸滿經行。心卽我也。身卽物也。脩身盡其心立其命。則丹道成矣。要知此水從一中而生。今之常人。施一齋。造一塔。或三峰採戰。或枯坐誦經。或無爲。或禱祀。凡此等以爲向善則可。若曰脩道。實未得其門而入也。無言己性。有卽戕情。只那生我之門死我戶。豈非兩孔穴也。真人卽乾之體。太淵卽坤之象。故煉金丹。除此兌金。餘皆旁門。不能成道。黃帝老子。從古聖仙。皆用此金。方能了道。鉛汞相交結而爲夫婦矣。伏者伏先天之炁。欲作仙佛。不得同類。雖入園百處。打坐千年。終落空亡。此書爲賢者談。曷肯輕述。若是先天之水。又待其水之清而後用之也。脩丹一事。本爲延壽登真。若差一髮。反傷壽矣。東南曰我。西北曰彼。則知古聖大賢。非有所師。寧敢虛說也。伯陽止以金來歸性初一語皆盡。陰牝陽牡。相從配合。老子號此心爲玄牝門。雲房指此心爲生門死戶。牡初小往。牝乃大來。若帝王能承御乾坤。逆順之道。則千載之壽亦未爲多。精從內守。炁自外生以煉丹。可以入聖。故順而生物者人也。逆而生丹者聖也。況乎人身。眞陰眞陽。切在心胸。未明陰陽。豈知同類。觀其三教脩養之端緒。皆要同類。方得成功。世之愚人。不看丹經。謂脩行者。必居深山。必先孤處。必棄妻子。必當辟穀。必合無爲。必要打坐。以此爲道。何其愚哉。雌雄得類。顛倒相感。而行金丹之道。能令陽復。是謂返老還童也。是長生久視也。欲求還丹。必求先天一炁以成也。孔竅者包括玄妙之深。非賢不語。故父不能傳子。臣不得獻君。然補陰必用陽。補陽必用陰。則陰陽和而工易施。非種難爲巧者。生一陽之汚於壬癸鄉。陰上陽下。地天泰也。首行武火。煉己之時也。尾行武火。溫養之時也。中間却行一符之文火以煉丹也。何謂道。先天一炁之造化也。要取於人。而不失於己。金丹之寶。人人有之。家家有之。眞陽初動。乃曰初生。此靈父聖母之炁逆。故生仙生佛。求先天眞鉛。必從太初受炁生身之處求之。仙翁當時欲以口授秘訣與人。然一世鮮有信受奉行者。同性爲一家。同情爲一家。同根爲一家。鼎器者何。靈父聖母也。藥物者何。靈父

聖母之炁也。若求同類。大隱市廛。坎電者。乃彼鉛炁發生之時。我即乘其時至。發崑崙之火應之。若非兩家各以彼此之土合之。則一炁何由而往來。他們說得行不得。我們行得說不得。若貪天上寶。須用世間財。夫我之物為龍。彼之物為虎。若得外丹。神仙之能事已畢。若不得真師口授。雖知藥物。丹亦無成。水清金旺。三日藥生之時。一年十二度月圓。月月有陽生之日。陰陽一交為泰。癸生則盈。望遠則虛。蓋家園自育金花種子。自可栽培。順則生人。逆則生丹。世人為不知轉生殺之機。內藥不離自己身中。外藥不離色相之中。真鉛在造化窟中而生。真汞居造化身中而生。勤脩得行。廣積陰功。聖人去彼寧取此。說破死生骨董門。不知求食於誰母。便把江西一口吞。夜來月到腳跟明。一滴難酬萬兩金。裙釵之下全人育。認色認身已誤却。須入虎穴得虎子。正是千錢貫穿。天地難遷我自如。



